

Schnitzelbänk 2007 (Schacher Sepp)

Vom Leuä z Schänis
Verzellt mer sich so Gschichtä
Im undrä Stock laufi nämis
Vilicht weiss öper vo üch was z brichte

(Im Schänner-Lied heisst doch irgendwo „ Solang die Bäche sprühn vom Hang“. Zu dem isch üs no öpis chlises in Sinn cho)

Solang die Bäche sprühn vom Hang
Chömer go Wasser zum Huus us schüttä
Dä Gmeindrat seit äs gech nüm so lang
Und scho hämer's wider i dä Hüttä

Ich bi dä Zahner Patrick
Ha am Big Eleven chli einä gha
Im Siech inä han ich än Tick
Legg anstatt Hosä äs T- Shirt a

(z Schänis git's anschinend Firmä-Wiänachtsässe wo so richtig d Poscht abgaht)

Am Albert Düring sini Mannschaft
Macht i dä Bärebar än huerä Krach
Mit Leitere, Barhöcker und vill Kraft
Bringt sie als Bänd für under s Dach

Bi dä Rickli Bruno, kän grossä Fisch
Mir haut än Stier ab is Riet, so dumm
Will min Vater i dä Feriä isch
Schüss än sälber mit sim Jagdgwehr um

Dä Zwifel Däni und dä Judä Andi
Händs am Jumausflug welä wüssä
Si spilet z' Fläschenspiel mit'rä Wiberbandi
Am Schluss händs mitenand müssä küssä

Ich bi d Melanie Schwitter
Nach äm Big Eleven gangi id Windegg hei
Is Chaschtli müesti, so bitter
Ja wer kä Chopf hät, de hät Bei

Bi im Club 99, heissä Stolä Migg
Bring mini Kollegä gwaltig is stutzä
Will am Schiiweekend hani än neuä Trigg
Nimmä Sunnäcrème zum Zähputzä

(Wiä mer so ghört, gits i dä Waldeggstr. anschinend än ganz heiklä
Parkplatz i dä Tüfgarage undä)

Ich bi d Chüeni Nicole
Wäg mim Parkplatz chum ich no zum spinnä
z Usäfahre gaht nöd so toll
So lani d Helfti vom Auto no dinä

(Am Bogmä-Frohsinn-Derby hät mer ä nöd gad alltäglichi Szenä chönä
beobachte)

Für dä Richi Trämp, dä Willi Schwitter
Dä Hansruedi Büsser, dä Chläus Fäh
Gaht z Derby im Frohsinn dinä witer
D' Schii no ahgschnallt gönds eis go näh

Bi dä Lidl, bi nöd z toppä
Ha glii ä Filialä z Schänis
Bi mir chamer billig go schoppä
Äs git halt irgend nämis

Bi dä Dr. Brunner, bi nümä da
Bi eifach gange im Januarloch
Dr. Koch heisst jetzt dä neuu Maa
Mal luegä was de so chocht